

## Инсонлар ҳайрон қолишди...



16:14 / 12.08.2024 3386

Инсонлар ҳайрон қолишди...

Қандай қилиб мажусий Абу Луълӯъа мўъминлар амири Умар ибн Хаттоб розияллоҳу анҳуни Масжиди Набавийда, бомдод намозини ўқиётганида қатл қилди? Ахир бу мажусийни мусулмонлар Рум асирлигидан қутқариб Мадинага олиб келишган эди-ку! Уни бунга қандай ишонтиришди?!

Инсонлар ҳайрон қолишди...

Ибн Сабаъ қандай қилиб баъзи мусулмонларни халифа Усмон ибн Аффон розияллоҳу анҳунинг зулм қилаётганига, жавр қилаётганига ишонтирди? Улар Усмон розияллоҳу анҳуни Қуръон ўқиб турганида қатл қилишди! Уларни бунга қандай ишонтиришди?!

Инсонлар ҳайрон қолишди..

Қандай қилиб инсонларга диёнатли кўринаётган, Қуръон ҳофизи бўлган Абдурахмон ибн Мулжамни мўъминлар халифаси Али ибн Абу Толиб розияллоҳу анҳуни намозда турганида қатл қилишга кўндиришди? Уни бунга қандай ишонтиришди?!

Инсонлар ҳайрон қолишди...

Қандай қилиб имом Ҳасан ибн Али розияллоҳу анҳудан фақатгина яхшилик кўрган ходимини уни қатл қилишга, унга заҳар беришга кўндиришди? Уни бунга қандай ишонтиришди?!

Инсонлар ҳайрон қолишди...

Қандай қилиб Язиднинг қўшини Расулуллоҳ соллаллоҳу алайҳи васалламнинг набиралари имом Ҳусайн розияллоҳу анҳунинг бошини кесди, танасини мусла қилишди? Буни очиқ-равшан ҳақ деб уларга ким уқдирди, ким ишонтирди?

Инсонлар ҳайрон қолишди...

Мисоллар кўп. Ишонтириш услуби ҳам бисёр. Гоҳида дин номи билан, гоҳида ватан номи билан, гоҳида курси ва унга ўтирган киши номи билан ишонтиришди...

Аммо аниқ ҳақиқат шуки, бу жинойтларга ишонганлар фосиқ ва фожирлар бўлишган. Уларнинг бу ишончлари Аллоҳнинг олдида нажот бера олмайди. Зеро, бу ишонч тескари фитратнинг ишончидир. Бу фитрат ёмонликдан қайтаришни билмайди, яхшиликка буюришни билмайди, фақатгина ҳавойи-нафси истаган нарсани тўғри деб билади.

Умар, Усмон Али, Ҳасан, Ҳусайн розияллоҳу анҳулар дунё ва охираат саййидлари бўлиб қолаверади.

Уларнинг қотилларига дунё ва охираатда маломат етаверади.

Аллоҳнинг адолат мезонида зарра зулм йўқдир. Фитначиларга ақллари зийнатлаган ва шайтонлари чиройли кўрсатган нарсалари фойда бермайди. Адолатли халқ гарчи оз бўлса-да, Аллоҳнинг бу заминдаги гувоҳларидир. Кўпчилик эса ҳар бақирганга эргашиб кетаверадиган оломондир!

Аллоҳ улардан қиёмат кунида: «Сизларни дўзахга нима киритди?», деганида улар: «Ботилга шўнғувчилар билан бирга шўнғир эдик!»,

дейишади!

**Доктор Мустафо Маҳмуд**

Ушбу мақола Ўзбекистон Республикаси Дин ишлари бўйича қўмитанинг 2024 йил 3 август  
03-07/4702-сонли хулосаси асосида тайёрланди.